



DEO OPTIMO MAX.  
UNI ET TRINO,

VIRGINI DEI - PARÆ ET S. LUCÆ  
Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS  
*manè discutienda in Scholis Medicorum, die Jovis tertio mensis  
Maii, Anno Domini M. DCC. LIX.*

M FRANCISCO MERY,  
Doctore Medico, Præsides.

*An salubrior Sequana?*  
I.



EGIONES, urbem, sanas nè dixeris quas torridus  
exurit aër, squallor suffocat, infestatque aquarum penuria.  
Dant salubres & indicant serenus æther, Elemento-  
rum consensus, successiva, æqualis & moderata Horarum,  
Dierum, Tempestatum, Annique vicissitudo & misce-  
la, temperata caloribus cum frigore libratio, frons ad Orientem

A

plurimum directa, amicorum dulcis aura ventorum, vegeta firmi corporis habitudo, color floridus, firmum caput, sensus acuti, quid tandem? Uberior leni cursu properantis aquæ affluxus & sinceritas. Sed aquam nè temerè pronuntiaveris sinceram. Quid ad hominum sanitatem valeat aqua, non noscitur pondere, non mollitie æstimatur, non judicatur coctione. Intemeratæ bibentium explorentur fauces, celebreturque præ cæteris si cum nullâ pulmonum debilitate, ventriculi pondere, dolore viscerum, alteriusve partis obstructione, coquendis aptissima leguminibus, panî ritè conficiendo nata, cujuscumque sit expers saporis, promptè calori frigoriqûe suscipiendo æqualiter parata. Quæ hisce prædita dotibus agnosceatur aqua, salubris & eadem meritò nuncupabitur, eò salubrior quòd cumulata magis.

## I I.

**O**R B I S universi compendium Gallia. Famosas suæ ditionis mil-  
le inter Urbes, Lutetia non minùs præstantissimorum ferax ingeniorum, quàm magnitudine, numero, ornatu, splendore, opibus conspicua, omnium facilè princeps. Triplicem spectat solis exortum; altioribus & innumeris densissima licèt ædibus, omnium tamèn est, montibus non intercepta, ab ortu & septentrione saluberrimè afflantibus pervia ventis, multum ab Austro & occidente spirantibus aver-  
sa. In mediis luti faculentioris sordium halitibus, in tantâ hominum undique advolantium frequentia, non grassatur tetra lues, pestisve contumax: non frequentius densat funera inexplabilis in otio diversissimorum eduliorum ingluviès: in Incolis nec φιλοπόνοις nec φιλογυμναστοις, sed solâ Scytharum more exercitatis unctione, non inferior Martialibus Romanis emicat animus. Tot mirandorum causam scrutaris avidus? Cæli inter Polum & circulum æquinoctialem fermè medii agnoscas dona; temperatæ soli directionis dotes, fecundissimæ salubriorisque Sequanæ irrigationis munera.

## I I I.

**Q**U I B U S N A M constet elementis aqua quam vehit Rex fluviorum Sequana, scrupulosius inquirent Chimix sectatores. Sola dux nobis experientia, testes effectus. Quantum hæc cæteris omnibus præcellat, oculato cuilibet quàm facile demonstrabunt. Sequana nec alto nimis nec depresso ad Orientem hybernum natus loco, Junnam recipit cancrorum divitem, defluentem ab ortu æstivo Ma-

tronam, Bibaram tandem temperandæ cerevisiæ Tyriisque coloribus nulli secundam. Tot onustus divitiis, solaribus ubique expositus radiis, non stagnans ut Garumna, non Rhodani modo furentes præcipitans aquas, non Tiberis instar templa dejiciens & ædes, non segniter torpens ut arar, æqualis semper, otiosus nunquam vel citior, qualis æstate talis hyeme, tumens rarò detumensque ingreditur Lutetiam aspectu gratissimus, amplissimamque civitatem ad triplicem solis exortum dividens tripartitam, uberiori alveo quæ munera non fert, quæ non avertit mala vel præcavet? Fertilitatis, abundantia, munditie, annonæ parens est & conservator. Infestas crassioris luti sordes abluit & repurgat; pestiferos cloacorum halitus dissipat & retundit; abstergit squallorem, temperat aërem & renovat, singulisque vitæ beatoris usibus & commodis non impar, levitatem dat pani, debitam coquendis leguminibus largitur molliem, optimum est carnibus condimentum. Sed cum Sequana tot munera dividant cætera quælibet flumina, non alia epotatione certare audeat aqua.

## I V.

**F**ELICES nimium Parisii si sua bona norint! Quem sincerum fundit Sequana laticem pleno haustu ebibant avidi. Non salubriorem aquam cæteris mortalibus obtulisse benignam rerum parentem naturam conservata diu sanitas evincet, reparata citius. Quid est etenim quòd facile parabilis ille liquor incolis beneficii non præstet? Spiritu vitæ turgidus, gratus palato, viscera facile permeans, non gravis Stomacho, Pectoris amicus, sitim fugat protinus & explet; appetitum, quo non exquisitior coquus, excitat & promovet; genuinum est non fictitium fermenti genus illud quò promptius in ventriculo dividuntur alimenta, concoctio perficitur placidiùs, tutius properat distributio, fluidiorque nascitur chylus dulcis & blandus, puri sanguinis per vasa facili lapsu decurrentis fons innocuus & reparator. Quis potentius æstuantis corporis fluidorum compescit impetus? Solidorum sedat spasmos? Nativum sanguini & humoribus instillat vehiculum? Quis melius alvum continet mollem, tardiorum stimulat, aperit urinæ vias, salia dissolvit, calculosis obstat concretionibus, transpirationem secretionum saluberrimam promovet, putredinem arcet futuram, sistit præsentem, dolores mulcet, avertit lentorem, moram rumpit, emollit dura, tensa laxat, involvit acria, nociva foras amandat, dat tandem æquilibrium & servat? Aquæ Sequanæ potatores aspicias? Quis oris nitor, vultus color floridus, oculi fulgor? Ingenii mireris aciem! Vigorem membrorum, corporis

4

mentisque fecunditatem ! Ut rarius ægrotant , sanantur facilius ;  
longamque beati numerant annorum seriem in senectute juvenes.  
Sed obstupefcere definas. Incolis , si cauti , Medicina est universalis  
Sequanæ.

V.

**N**E fallacibus verbis temerè credas , clamat ignara plebs , fe-  
rentemque dona timeas Sequanam. Si salubrior , inquit , cur  
non alibi frequentius quàm Parisiis distorti corporis ingruunt nã-  
vi ? Cur mulieres non pauca , succi plenæ licet , tumentibus protu-  
berant alvis gibberæ sæpius , calculosis viri infestantur concretioni-  
bus , herniis tentantur juvenes ? Cur contumaces aded Diarrhææ ,  
Rhumatismi , Arthritides ? Stolidum sanè vulgus ! Quibus debelletur  
arma ministrat inscium. Quis , quæso , varos valgosque Ægyptiorum  
pedes , excedentia labia , crispamvè cæsariem fertiliori Nilo tribuerit  
unquàm ? Cæteris vix cogniti nationibus incolas Sequanæ laceßunt  
morbi ? Quid culpas Sequanam ? Habitantium incusa gulam , cras-  
sioribus ferculis fatiscences mensas , condimenta ciborum non infe-  
riora venenis , fatales vini spirituosique cujuslibet liquoris illecebras  
effrenatam venerem , longiorem somnum , desidisque otia vitæ Quid  
valeat Sequana experiri audeant ? Tot malis non tutior mediæla ,  
non præstantius pharmacum. Aquas formident subterraneas , stagnan-  
tes , paludosas , puteales , frigidas , nivales. In longam diem inse-  
minant morbos , pestiferoque potu trucidant. Non fontes laudentur  
Isiaci , non Bellavillei , non Regniacenses ; heu malè plumbeis in  
universam urbem rubis derivantur crudiores : solus de mediõ flumi-  
nẽ bibatur Sequana ; æternũque concludetur ,

*Ergo salubrior Sequana.*

Proponebat Parisiis JOANNES - ARMANDUS ROUSSIN DE  
MONTABOURG , Parisiensis , Saluberrimæ Facultatis Medicinæ  
Parisienfis Baccalaureus , A. R. S. H. 1759.

A SEXTA AD MERIDIEM.